

E legendario maestro musical y miho trompetista di jazz Colombia

miho conoci como: lalo - mr. Bugle



Siman pasa Aruba a ricibi e tristo noticia cu e maestro musical y musico legendario Sr. Eduardo Maya a bay laga nos, lagando un tesoro musical atras. Pa conta un poco di e trayecto di e gran musico aki. Eduardo Rafael Maya Agreda a nace dia 17 di januari 1946 na Sandomá,

Nariño na Colombia. Eduardo Maya yega Aruba na año 1968. El a contra e matrimonio cu Sra. Filipina Tromp, di cual a nace su 3 yiunan: Nancy, Cynthia y Eduardo Jr. Eduardo. E tabata wordo yama, el Maestro aki na Aruba y na su Pais, el Mejor Trompetista y pionero di Jazz Colom-

bia.

Manera cu e noticia a drenta cu Eduardo Maya a fayece por a mira un gran cantidad di reaccion y palabranan di convivencia di parti musiconan tanto local como tambe internacional y muy particular di Colombia caminda e tabata conoci como un di e figuranan mas revelante di e musica di su region, trompetista, arreglista y compositor.

Den añanan 60 el a cuminsa lesnan di musica na su tera natal y despues na Pasto. E ta un famia di 8 ruman homber y na un edad hoben a muda pa Bogotá caminda el a realisa su estudio di musica na e Universidad Pedagógica y e Conservatorio di e Universidad Nacional. Despues el a bay New York caminda el a siña e tecnica di improvisacion. Ora cu el a bolbe bek Colombia el a forma parti di diferente agrupacionnan musical famoso. Como tambe el a forma e banda Grupo Maya, cual tabata dedica na e ritmo salsa caminda el a graba dos album cu Philips y Fono bosa. El a crea proyectonan propio di jazz y funk como Mister Bugle, Camara Jazz y su Caribenan Big Band cual a wordo lanta na Aruba despues cu el a yega y establece su mes. E tabata un artista musical cu a sa di destaca como explorado di e ritmo nan manera Jazz latino, salsa y funk.

Aki na Aruba cu su banda Grupo Maya, el a traha hopi año na Concord Hotel Aruba y ultimo el a traha na Hyatt

Hotel. Tambe el a comparti escenario cu diferente grupo y musico na casi tur hotel aki na Aruba, Cas di Cultura, den Aruba Jazz and Latin Music Festival, Caribbean Sea Jazz Festival, Aruba Music Festival y hopi festivalnan mas local y internacional. Varios di nos artistanan local y como tambe internacional el a yega di comparti escenario, cualnan ta mucho hopi pa menciona. Na un cantidad di ocasion Sr. Eduardo Maya a forma parti di orkestra nacional y a comparti su talento y demostra su stimacion pa nos pais y cultura durante manifestacion cultural riba Dia di Betico y Dia di Himno y Bandera riba Plaza Libertador Betico Croes.

Diabierna 2 di October ta bay ta su despedida, y despues

nan lo hiba su shinishi Colombia, na unda ta bay tin un homenahe pe. Eduardo, su shinishi ta bay Colombia, pero su recuerdonan ta keda Aruba, na unda el a biba un gran parti di subida y cu su curason Arubiano.

Minister di Cultura Sra. Xiomara Maduro ta gradici su famia pa por a comparti Eduardo cu pais Aruba caminda el a comparti su talento musical alegrando y terciendo ambiente pa nos local y bishitantenan. Palabra di condolencia na su yiu Nancy, Cynthia y Eduardo Jr. y henter famia, amigo, conocinan, su ex-studiante- y coleganan musico.

Hopi forsa na e momento aki. Cu e legendario maestro musical Eduardo sosega na paz den Reino di Señor.

